



ATASSUT
Steen Lyngø

UPA 2016/93
25. 05. 2016

Meeqqani inuusuttunilu hashimik imigassamillu atornerluinerup qanoq pitsaanerpaamik pinaveersimatinnissaanut akiornissaanullu oqallisissiaq aallaavigalugu oqalinnissamut siunnersuut.

(Inatsisartuni ilaasortat, Naaja H. Nathanielsen, Attaviitsoq aamma Agathe Fontain, Inuit Ataqatigiit)

Aallarniutigalugu ATASSUT-mit qutsavigerusuppavut Inatsisartunut ilaasortat attaviitsoq Naaja H. Nathanielsen aamma Agathe Fontain, Inuit Ataqatigiinneersoq ataatsimoorlutik apeqquteqaat aallaavigalugu oqallisissiatut siunnersuummik pingaarutilimmik soqutiginaateqarluartumillu saqqummiussaqaqnerannut, tamannalu ima ATASSUT-mit oqaaseqarfigissavarput.

”Siusissukkut iliuuseqarneq” uani oqalinnissamut siunnersuummi sammineqarpoq - tamannalu ATASSUT-mit paasilluarparput aammalu pisariaqarsoriivipparput timitalersorneqarnissaata qulakkearniarneqarnissaa, pingaartumik meeqqat inuusuttuaqqallu 18-t inorlugit ukiullit pineqartillugit.

Tassungalu atatillugu siunnersuuteqartut apeqqutit toqqaannartut pingasut siunnersuutiminni qaqitai tassaapput:

- 18-it inorlugit ukioqaraanni atornerluisutut katsorsarneqarnissaq nammineq aalajangerneqartassanersoq?
- Meeqqanut inuusuttunullu katsorsarneqarnissamut qularnaveeqqusiisoqassanersoq?
- Inatsisit atuuttut sukaterneqassanersut, soorlu hasheernianut pineqaatissiissutinut sulilu 18-liineqanngitsunut sukaterisoqassanersoq?

ATASSUT-mit isumaqanngilagut 18-it inorlugit ukiullit namminneq atornerluisutut katsorsarneqarnissaq aalajangigassarigaat - soorunami angajoqqaat inuusuttut meeqqallu qanimut

suleqatigalugit qanoq ikorfartuinissaq aaqqissuunneqassaaq. Nalunngilarpulli imigassamik, aangajaarniutitik, aningaasanoormilluunniit katsorsartinneq tamatigit iluatsinneq ajorpoq nammineq ajornartorsiummik nassuerutiginnissinnaanngikkaanni, taamaattumik tassani pisariaqarluinnartussaavoq qanoq meeqqat inuusuttullu ajornartorsiuteqarnerminnik takunnissinnaalersinnissaat aammalu nassuerutiginnissinnaalersinnaaneritut.

Meeqqanut inuusuttunullu ikiuinissamut Inatsisartut inatsisaata nutarnerneranut atatillugu ATASSUT-mit pingaaruteqarsoraarput qularnaveeqqusiisarnermut tunngatillugu katsorsartinnermut atatillugu aamma periarfissat ilanngullugit misissorneqartariaqartut.

18-it inorlugit ukiulinnut imigassamik aammalu hashimik tuniniaasarnermut atatillugu inatsisit atuuttut sukaterneqarnissaanut atatillugu ATASSUT-mit isumaqarpugut siullertut isiginiassallugu inerteqqutaareermat 18-it inorlugit ukiulinnut imigassamik tuniniaaneq aappaattut hashi inerteqqutaareerpoq aammalu sulit inuusuttut imminut oqartussaaffigilersimangitsunut tuniniaaneq pisimappat taava ATASSUT-mit isumaqarpugut pisariaqavissoq tamanna sukateriffigissallugu.

Taamatut apeqqutit toqqaannartumik apeqqutigineqartut ATASSUT-mit akissuteqarfiginerisa saniatigit, periarfissaq manna iluatsillugu ATASSUT-mit Naalakkersuisunut apeqqutigissavarput meeqqat inuusuttullu ikiorneqarnissaannut inatsisip nutarterneqarneranut tunngatillugu katsorsartinnermut qularnaveeqqusiisarnermut tunngassuteqartut qanoq aaqqissuunniarneqarnersut?

Oqallinnermullu atatillugu ATASSUT-mit ilanngullugu oqaatigissavarput pinaveersaartitsinermut suliniutit ataavartumik meeqqat atuarfiini ingerlanneqartuarnissaat aammalu SSPK-mi sulinerup ataavartumik ingerlanneqartuarnissaat kaammattuutigissavarput, aammalu tassunga atatillugu Naalakkersuisunut apeqqutigissavarput pinaveersaartitsinermut suliniutit ilumut eqqortumik ingerlanneqarsimanersut qulakkeerniarlugit nalilersuisoqartarnersoq aammalu qanoq pissutsit allangoriartorneritut; tassalu atuisut atonerluisullu nukanganeruleralluttuinnarneritut naleqqussaasoqarsinnaatiginersoq?

Taamatut ATASSUT-mit oqaaseqarluta siunnerfeqarluartumik oqallilluarnissamik kissaassissaagut.

Qujanaq!